

I 120 573

QVÆSTIO MEDICA

QVODLIBETARIIS DISPVATIONIBVS

MANE DISCVTIENDA

IN SCHOLIS MEDICORVM

Die Iovis 15. Decembris.

M. PETRO LOMBARD, Doctore Medico, Præside.

Sunt-ne in Dysenterico Affectu Hypnotica Cathartica admiscenda?

I.

NATVRÆ præcipua circa nutritionem cura est, & quas utilissimo huic operi præfecit partes adeò diligit, ut vel leviter eas affici citra summum dolorem non ferat, & gravem totius naturalis œconomie perturbationem. Nam os ventriculi superius succi ferocioris acrimonia si mordet in Cardiogmo, statim corporis universi vires, aliàs integræ, concidunt, & ipse animus deficit. In cholera, ad ventriculum & intestina, non ex affectis visceribus expressæ modò, sed iis ipsis in partibus etiamnum genitæ putredinis imperus illicò vel citra febrem interimit. Lumbrici quos dulcioris alimonie vivax excitavit corruptio, non rarò sæva & terrificæ pariunt syncopes, convulsionis, delirijque symptomata, qualia graviores morbi & ipsis principibus membris insensu non invadunt. Quin & plenioris sicut & extremi intestini affectus ipsi solâ doloris immanitate in magnos evadunt resolutionis membrorum & abscessuum morbos, dum ex spirituum dissipatione & corruptione quas acerbis & tristis sensus inferre consuevit, simul partibus imbecillitas & humoribus vitium, infertur, & calamitosa illa oritur, inque omnem ferè viventis partis perniciem nata proclivitas ad excipiendum quidquid abs se validiores amandaverint. Sed inter cæteras nutritiorum viscerum noxas, Dysenteria quæ non-

nunquam suo pte genio salutaris est, & solâ symptomatum atrocitate metuenda, Medicos monet, quàm solliciti esse debeant de sublevandâ hacce maximâ oneris parte naturâ, quam & aliquando parum lædunt sua mala, si ea ignoraverit.

I I.

DYSENTERIA ab affectâ parte & symptomate nomen obtinuit. In eo quippe morbo vasa coquendis, distribuendis, & expurgandis alimentis destinata vitiantur: tùm verò & domesticillius operis moderatrix illatam sibi injuriam aut solâ excretionem, aut etiam dolore significat. Si enim non illaudatus sanguis ob amputatam corporis portionem, aut intermissum aliquod exercitium, suppressamve solitam evacuationem hepate benè constituto, restagnans per circuitus liberaliter ad intestina devolvitur, ἐξερυστὼ seu αἱματηρὴ procreat Dysenteriam, doloris quidem omnis, non verò semper utilitatis expertem. Est etiam ubi absque sensu, sed non sine periculo sanguis dilutus excernitur loturæ carniū recēns mactatarum similis, ἀτρίαι jecoris & illius σπινθί, arguens. Sed utraque hæc Dysenteria solâ effluentium humorum ratione nomen adepta, non germanam & integram exhibet affectus naturam, quam & longè aptius Romanorum vocabulum exprimit. Tormina enim vocant frequentem & dolorificam cruentorum & paucorum humorum dejectionem, cujus assiduitate intestina abraduntur, exulcerantur, & carunculas tandem mittunt. Causam si quæras, eam vel ex prægressi morbi vestigiis invenies, vel ad humoris biliosi & acris ferociam malignitatemve referes. His originem præbent prava vivendi ratio, ciborum acriorum aut faciliè putrescentium esus, fructus immaturi aut præter modum assumpti, vinum meracum vel largiùs haustum, deleteria medicamenta, pestilens & contagiosa aëris constitutio. Nam talibus de causis sobolescit mordax & effrenis humor, qui in intestina delatus, morsu primùm excruciat, hinc utilem & partibus indutam uliginem absomit, tùm propriam abradit intestini substantiam, quam altius infixus tandem exulcerat.

I I I.

MAGNVS sanè morbus & ob publicæ functionis læsionem & ob symptomatum sævitiam. Ille ad nocendum paratas comites adsciscit febrem, vigiliis, sitim, anorexiam; in primis verò assiduis doloribus ægrotantem conficit. indefinens fermè adeit desidendi cupiditas, quod egeritur paucum est, tenue, mucosum, graveolens, cruore, ramentis, sanie nonnunquam & ca-

runculis immixtum. Interim humor ille, seu biliosus fuerit seu succus ater ex inflammata face sanguinis expressus, agit cuniculos, tenuibusque intestinis si inhæsit, dolor perſentitur acutissimus & punctorius, sanguis & ramenta per longioris viæ tractum facibus exquisitè permixta profluunt, aliquo post mitigata tormina tempore. Crassis multò placatiorem se præbet dolore non ita vehementi minùsque diuturno, cruor purulentaque materies ob itineris brevitatem alvi excrementis supernatant, aut non omninò permixta apparent, atque conjunctiora ipsi dejectioni tormina sunt. Periculosior morbus censetur quem fecit aëris corruptela, vel summa atque maligna Cacochymia, & partis cuiusdam principis Dyscrasia foveret. Certum discrimen minantur vigilie immodicæ, cibi fastidium, sitis intensa, singultus, vomitus bilioli jecoris ac præcordiorum dolor, dejectiones synceræ, nigricantes & carunculis permixtæ. Spem præbent virium appetitusque constantia, sitis minor, apyrexia, symptomatum imminutio, dejectiones suo sero dilutæ, nullisque aut paucioribus intertrimentis permixtæ, mitescentia nonnihil tormina, alvus aliquantulum coercita.

I V.

ARTE S quæris quibus ægrotantem periculo eximas; nocendi materiam morbo substrahe. Sed cave ne dolorem, vigilias, spirituum unâ cum tetris humoribus effluvium, quibus præsertim hostis iste grassatur, adaugeas; præsertim verò audacis Themisonis consilium omneque adeò ὀδυνηρόν βοήθημα perhorrescens placidè simul & viriliter dimicato. Propterea exquisitam institue victus legem, quæ tenuissima sit & refrigerans. In hordeatis & jusculis plurimus esto. Vino ut veneno interdicto. Sacra affectus istius anchora sicut & cæterarum inflammationum, seu foris seu intùs sæviant, tutissimaque sit tibi venæ sectio. Febrem extinguit illa, phlegmonem sedat, ruentis humoris impetum sistit ac revellit, ejusdem delinit acrimoniam, doloresque demulcet. Reperenda plenius crebrius pro jugi phlegmone & rheumate, symptomatum pervaciâ, morbi magnitudine, viribus ægrotantis. Clysteres anodynî & refrigerantes sæpius injiciendi. Vomitus conferret si exortus spontè, vel ἐν χειρὶ mitioribus quibusdam promoveretur, modò æger δυνάμεις foret latiorique pectore: Verùm ejusmodi evacuatio quæ nimio plus exagitat fugienda, quam præterea dehortatur summa virium in Dysentericis profligatio. Tepentis aquæ balneo dolor lenitur quidem, & sanguinis mitescit æstus: sed concitatâ ad partem affectam, novâ fluxione utcumque sopiti affectus rursùm excitantur. Adstringentia initis δυνάμει & ἡσυχίᾳ adhibita effrænâs profluvij cursum sistere creduntur, quem recursus putrentis Cacochymix confestim malignior excipit. Nec minùs nocent urinas moventia; nam quò natura vergit, si per

vias commodas suam excretionem molietur, eò ducere oportet. Tempore porro convenienti idoneâ medicamentorum miscellâ attemperandus simul est atque vacuandus humor. Id apprimè præstabunt Hypnotica purgantibus admixta, quæ furenti bili injicient frânos, laesque ac fomitem putredinis sensim exhaurient.

V.

HYPNOTICA etiam si *γλυκερόν καὶ ἐγέρσιμον* somnum inducunt, non tam morbum quàm illius sensum adimunt. Cathartica verò morbum palam & validè adoriuntur, & causas illius evertunt, sed Cadmæâ plerumque & non lætabili victoriâ, dum febriles faces agitatione magis ac magis accendunt, dolorem & vigilias adauctis irritatè jam satis naturæ stimulis ingeminant, & malè concitatos humores in præceps impellunt. Omnino neutrum seorsim satis tutum aut validum præsidij genus. Vtrumque optimum & salutare, si permixtæ vires laudabili temperie coalescant, & in integrum morbi ipsius simul ac symptomatum excidium amicè conjurent. Scilicet Hypnotica cruciantis humoris si placare feritatem penitus non valent, noxiam tamen in sensoris alterationem percipi non patientur, concessio soporis vel stuporis gratissimo & plurimum expetendo munere, interim dum Cathartica humores castigatione licèt exacerbatos, sed incassum in sopitam facultatem sævientes ejicient è corpore. Atque id ne severiore fiat quàm par est oburgatione, atque adeò effrænata vi ejus præsidij quod corpus non minùs quàm purgandos humores calefacere, attenuare, ac solvere natum est, tardam placiditatis suæ Hypnotica levitatem inspiciant, ac vicissim insensam calori nativo ipsius Hypnotici pigritièm nocere non sinent permixtæ Catharticorum vires.

Sunt igitur in Dysenterico Affectu Hypnotica Catharticis admiscenda.

DOMINI DOCTORES DISPUTAVRI.

M. Carolus Parin.
M. Philippus Chartier, Medicus
& Professor Regius.
M. Franciscus de la Chambre,
Medicus Regii Ordinarius.

M. Alanus Lamy.
M. Claudius Quartier.
M. Franciscus Landrien,
Chirurgia Professor.

M. Florimundus Langlois.
M. Claudius le Vasseur.
M. Dionys. Ionequet, Horti
Regii Professor Botanicus.

Proponebat Luteriæ DOMINICVS DE FARCY,
Parisiensis, A. R. S. H. M. DC. LXVII.

Ex Typographia FRANCISCI MUGUET, Regis ac Illustriss.
Archiepiscopi Paris. Typographi.